



Il nov object «Tgea Colani» ad Andeer è vegni surdà uffizialmain al manaschi.

FOTO P. GANZONI

Bun exempel per promover la convivenza

Andeer: Avertura dalla «Tgea Colani»

DA GION NUTEGN STGIER / ANR

■ Di da festa per la populaziun da la Val Schons e da la Valragn. En preschientscha da cusseglier guvernativ Christian Rathgeb è vegnida inaugurada la «Tgea Colani» ad Andeer. In object cun 12 abitaziuns e da quellasis per seniors. Custà ha quella chasa 8.8 milliuns francs. Sco en autras regiuns da noss chantun mancan er en la Val Schons ed en la Valragn lieus nua che persunas han occasiun da passentar lur saira da la vita. Quai vala per dunnas ed umens pli sin ils onns che dovran tgrira ubain ch'èn betg pli capablas da manar in agen perchasa. Cun l'avertura da la «Tgea Colani» ad Andeer da sonda passada è quella purschida per ils seniors e las senioras da la Val Schons e da la Valragn pli optimala che fin oz. Da nov stattan en disposiziun otg letgs e schizunt sis abitaziuns per seniors e senioras. Cun esser la chasa d'attempads Valragn ad Andeer cun 30 letgs dapi l'avertura avant diesch onns adina occupada è gia dapi divers onns il giavisch da blers da pudair augmentar il dumber dals letgs per persunas attempadas e che dovran tgrira. Suenter l'iniziativa da divers persunas, ma cunzunt da l'impressari Valentin Luzi è quel giavisch



Elisabeth Calonder, la presidenta dal consorzi da vischnancas Tgesa d'attempads Valragn cun Valentin Luzi, il patron da la nova «Tgea Colani».

FOTO O. ITEM

daventa realitad. Sonda passada è vegnida inaugurada ad Andeer la «Tgea Colani», ch'è vegnida construida en la vischinanza da la chasa d'attempads Valragn. Quel nov object sa chatta dentant er en il center da la vischnanca, damanaivel da las ustarias e butias, quai

ch'è segir in apsect positiv per persunas pli sin ils onns che vivan da nov en quel pitschen center per seniors e senioras.

Stanzas ed abitaziuns empernaivlas

Il plaschair tar la populaziun dad Andeer e da l'entira regiun è stà grond son-

da passada tar la festa d'inauguraziun da la «Tgea Colani». Gist en rotscha èn ils visitaders vegnids per assister a l'avertura da la chasa ch'è, da fitg gronda impurtanza betg angal per quels dad Andeer, mabain per l'entiera regiun. Suenter ina fasa da projectaziun pli lunga

nua che responsabels da la tgesa d'attempads existenta, represchentants da la Spitex Valragn, divers investurs, persunas da las autoritads da vischnanca e dal chantun èn stadas involvads ha Valentin Luzi, l'impressari indigen decidi da construir la «Tgea Colani». En quel object sin il plaunterren stattan en disposiziun a la tgesa d'attempads existenta, che sa numna da nov «Tgea Glienda», nov letgs. Bunamain avant quellasis stanzas sa chattà in parc empernaivel per quels seniors e quellasis senioras che vivan da nov en la «Tgea Colani». A disposiziun stat quel natiralmain er a las dunnas ed als umens pli sin ils onns che prendan en locaziun las sis abitaziuns sin il segund plaun. Abitaziuns endrizzadas fitg bain per seniors e senioras che san anc sez manar lur perchasa. Las dunnas ed ils umens che vivan da nov en la «Tgea Colani» han occasiun da far adiever da tut las purschidas ed activitads da la tgesa d'attempads la «Tgea Glienda». Sis ulteriuras abitaziuns ch'èn tuttas gia vendidas sa chattan sin il terz plaun dal nov object «Tgea Colani». Ina chasa che dat dapli vita a la vischnanca ed in objec ch'è segir in bun exempel per promover la convivenza tranter vegl e giuven, tranter ina regiun e cunzunt tranter senioras e seniors.